

ZAKON O IZMJENAMA I DOPUNAMA ZAKONA O POREZU NA DOHODAK

(„Službeni glasnik BD BiH”, broj 24/20)

Član 1

U Zakonu o porezu na dohodak (Službeni glasnik Brčko distrikta Bosne i Hercegovine, brojevi: 60/10 i 14/17) u članu 3 stavu 1 tački d) iza riječi: „zakonom“ interpunkcijski znak tačka: „(.)“ zamjenjuje se interpunkcijskim znakom tačka sa zarezom: „(;):“.

Iza tačke d) ovoga člana dodaje se nova tačka e) koja glasi:

„e) iznimno, rezidentom Distrikta smatra se i fizička osoba s prebivalištem u entitetima koja ostvaruje dohodak od nesamostalne djelatnosti kod poslodavca koji ima sjedište na području Distrikta.“

Član 2

Član 7 mijenja se i glasi:

„Član 7

(Prihodi na koje se ne plaća porez na dohodak)

Prihodi koji se smatraju dohotkom, a na koje se ne plaća porez na dohodak su:

- a) prihodi po osnovu naknade za vrijeme nezaposlenosti,
- b) prihodi invalidnih osoba koje su zaposlene u poduzeću, ustanovi ili radionici za radno i profesionalno osposobljavanje i rehabilitaciju invalida,
- c) prihodi po osnovu naknada za tjelesna oštećenja, umanjenu radnu sposobnost i naknada za pretrpljenu neimovinsku štetu,
- d) prihodi po osnovu naknada štete zaposlenicima po osnovu posljedica nesreće na radu,
- e) prihodi po osnovu nagrada članovima Akademije nauka i umjetnosti Bosne i Hercegovine i nagrada za tehničko-tehnološke inovacije,
- f) naknade osuđenim osobama za vrijeme odsluženja kazne u odgojno-popravnim odnosno kazneno-popravnim ustanovama,
- g) prihodi po osnovu stipendija učenika i studenata na redovnom školovanju do visine od 75 % (sedamdeset pet posto) prosječne neto plate prema posljednjem objavljenom podatku Agencije za statistiku Bosne i Hercegovine – Podružnica Brčko (u daljnjem tekstu: nadležni organ za statistiku),
- h) prihodi koje ostvare učenici i studenti putem učeničkih, studentskih i omladinskih zadruga tokom jedne kalendarske godine do iznosa osnovnog ličnog odbitka iz člana 25 stava 1 ovoga zakona,
- i) nagrade koje učenici ili studenti osvoje na takmičenjima u okviru obrazovnog sistema i organizovanim školskim i visokoškolskim takmičenjima,
- j) dobiti ostvareni sudjelovanjem u nagradnim igrama koje organizuju preduzeća u propagandne svrhe, a koji se isključivo odnose na proizvod ili paket proizvoda iz vlastitog proizvodnog asortimana, ako tržišna vrijednost takvih dobitaka nije veća od 1.000,00 KM,
- k) prihodi po osnovu kamate na štednju u bankama, štedionicama i štedno-kreditnim zadrugama, bankovnim računima i kamate na državne obveznice, obveznice koje izdaju entiteti ili obveznice Distrikta,
- l) prihodi po osnovu zateznih kamata na isplaćene plate i razlike plata po odlukama nadležnih sudova,
- m) prihodi fizičkih osoba po osnovu ugovora o zakupu nepokretne imovine koji između sebe zaključuju bračni partneri, roditelji i djeca, djedovi ili bake (nene) i unučad.“

Član 3

Član 11 mijenja se i glasi:

„Član 11

(Prihodi od nesamostalne djelatnosti)

(1) Prihodom od nesamostalne djelatnosti smatra se bruto plata koju zaposleniku isplaćuje poslodavac na osnovu ugovora o radu, odnosno radnog odnosa ili daje u stvarima, koristima, protivuslugama i u vidu premija i drugih prihoda za rad obavljen prema njegovim uputama, osim prihoda iz članova 6 i 7 ovoga zakona.

(2) Oporezivim prihodima od nesamostalne djelatnosti smatraju se i:

a) dodatni prihod na osnovu naknada, pomoći i slično koje poslodavac isplati zaposlenicima iznad iznosa utvrđenih posebnim propisima,

* Zakon je objavljen u „Službenom glasniku BD BiH”, broj 24/20 od 26. juna 2020. godine, a stupio je na snagu 4. jula 2020. godine.

- b) plata koju umjesto poslodavca isplati druga osoba,
 - c) korist koja se primi na osnovu nesamostalne djelatnosti, a odnosi se na:
 - 1) korištenje vozila i drugih sredstava za lične potrebe,
 - 2) smještaj, hranu kao i korištenje drugih dobara i usluga koji su besplatni ili po cijeni koja je niža od tržišne cijene,
 - 3) odobrene beskamratne kredite ili kredite s kamratnom stopom koja je niža od tržišne kamratne stope,
 - 4) izmirivanje ličnih troškova od poslodavca,
 - 5) izmirivanje ili oprost dužničke obaveze od poslodavca,
 - 6) topli obrok iznad iznosa od 1,4 % (jedan zarez četiri posto) osnovnog ličnog odbitka iz člana 25 stava 1 ovoga zakona za svaki dan koji je zaposlenik proveo na radu,
 - d) zaostale plate odnosno razlike plata koje se odnose na protekle porezne periode, a koje se zaposleniku ili bivšem zaposleniku isplaćuju u tekućem poreznom periodu na osnovu sudske presude,
 - e) svi drugi prihodi nastali na osnovu i u vezi s nesamostalnom djelatnošću.
- (3) Prihodi koji ne ulaze u dohodak od nesamostalne djelatnosti i koji ne podliježu oporezivanju su:
- a) pomoć za gubitak nastao kao posljedica elementarne nepogode i pomoć po osnovu ozljeda i bolesti koje isplaćuje poslodavac zaposleniku ili članu njegove porodice do visine utvrđene posebnim propisima koji regulišu ovu oblast,
 - b) troškovi smještaja koji poslodavac osigurava zaposleniku u mjestu gdje se obavlja djelatnost ako je neophodno korištenje smještaja za zaposlenika s ciljem obavljanja radnih zadataka,
 - c) pokloni koje poslodavci daju zaposleniku prilikom praznika i blagdana do iznosa od 30 % (trideset posto) prosječne neto plate u Distriktu za taj mjesec, najviše jednom godišnje,
 - d) otpremnina u slučaju otkaza ugovora o radu u skladu sa zakonima koji regulišu rad i radne odnose i kolektivnim ugovorom.“

Član 4

U članu 16 stavu 2 tački j) riječi: „alineja 7)“ zamjenjuju se riječima: „alineja 6)“.

U stavu 6 tački h) iza riječi: „strankama“ interpunkcijski znak tačka: „(.)“ zamjenjuje se interpunkcijskim znakom tačka sa zarezom: „(;):“.

Iza tačke h) dodaje se nova tačka i) koja glasi:

„i) rashodi koji su nastali po osnovu ugovora o zakupu nepokretne imovine zaključenog u skladu s članom 7 tačkom m) ovoga zakona.“

Član 5

Član 25 mijenja se i glasi:

„Član 25

(Lični odbitak)

(1) Osnovni lični odbitak rezidentnog poreznog obveznika iznosi 6.000,00 KM na godišnjem nivou, odnosno 500,00 KM mjesečno.

(2) U skladu s članom 5 ovoga zakona rezidentnom poreznom obvezniku ukupan iznos ostvarenog dohotka umanjuje se za osnovni lični odbitak iz stava 1 ovoga člana za porezni period za koji postoji obaveza plaćanja poreza.

(3) Ako porezni period iz stava 1 ovoga člana kraće od kalendarske godine, osnovni lični odbitak razmjerno se umanjuje i računa u korist poreznog obveznika na puni mjesec.

(4) Rezidentnom poreznom obvezniku osnovni lični odbitak iz stava 1 ovoga člana može se uvećati za 50 % (pedeset posto) za bračnog partnera i djecu do navršanih 27 godina starosti koji se smatraju izdržavanim članom uže porodice.

(5) Rezidentnom poreznom obvezniku za utvrđenu vlastitu invalidnost i invalidnost svakog izdržavanog člana uže porodice može se uvećati osnovni lični odbitak iz stava 1 ovoga člana za 10 % (deset posto) na svakih utvrđenih 20 % (dvadeset posto) invaliditeta.

(6) Rezidentnom poreznom obvezniku za izdržavanog člana uže porodice osnovni lični odbitak može se uvećati za 50 % (pedeset posto) od osnovnog ličnog odbitka za utvrđenu trajnu invalidnost na osnovu rješenja nadležnog organa.

(7) Lični odbitak poreznog obveznika utvrđuje se kao zbir osnovnog ličnog odbitka iz stava 1 ovoga člana i ličnog odbitka iz stavova 4, 5 i 6 ovoga člana.

(8) Rezidentni porezni obveznik može lični odbitak uvećati za uplaćene premije za životno osiguranje koje ima karakter štednje do visine od 30 % (trideset posto) osnovnog ličnog odbitka iz stava 1 ovoga člana.

(9) Rezidentni porezni obveznik može lični odbitak uvećati i za iznos kamate plaćene na stambeni kredit.

(10) Pod kamatom iz stava 9 ovoga člana podrazumijeva se kamata plaćena u poreznoj godini na stambeni kredit koji je porezni obveznik uzeo s ciljem rješavanja svog stambenog pitanja, i to za prvu nekretninu.

(11) Pravo iz stava 9 ovoga člana prestaje otplatom tog stambenog kredita.

(12) Porezni obveznik koji ostvaruje pravo iz stava 9 ovoga člana godišnje dostavlja Poreznoj upravi dokaz o plaćenju kamati na stambeni kredit.

(13) Uvećanje ličnog odbitka iz stava 9 ovoga člana priznaje se nakon ličnog odbitka u konačnom obračunu poreza na dohodak na osnovu podnesene godišnje porezne prijave i potvrde banke o visini plaćene kamate na stambeni kredit.

(14) Rezidentni porezni obveznik može lični odbitak uvećati i za iznos troškova školovanja djece.

(15) Pod troškovima školovanja iz stava 14 ovoga člana podrazumijeva se uplata školarine.

(16) Porezni obveznik koji ostvaruje pravo iz stava 14 ovoga člana godišnje dostavlja Poreznoj upravi dokaz o plaćenju školarine.

(17) Uvećanje ličnog odbitka iz stava 14 ovoga člana priznaje se nakon ličnog odbitka u konačnom obračunu poreza na dohodak na osnovu podnesene godišnje porezne prijave i potvrde o plaćenju školarine.

(18) Izdržavani član uže porodice iz stavova 4 i 5 ovoga člana je fizička osoba čiji dohodak i drugi prihodi u godini za koju se utvrđuje porez na dohodak ne prelaze iznos iz stava 1 ovoga člana.

(19) Ako više osoba izdržava istog člana ili članove uže porodice i djecu, lični odbitak za te osobe ravnomjerno se raspoređuje na sve osobe koje te članove izdržavaju, osim ako se ne dogovore drugačije.

(20) Djecom se u smislu stava 4 ovoga člana smatraju djeca koju roditelji, skrbnici, usvojitelji, očuh i maćeha izdržavaju.

(21) Rezidentni porezni obveznik može koristiti lične odbitke iz stavova 1, 4, 5 i 6 ovoga člana za period za koji postoji obaveza plaćanja poreza i u kojem izdržava osobu, s tim da se period zaokružuje u korist poreznog obveznika na puni mjesec, a neiskorišteni lični odbici ne mogu se prenositi u naredni porezni period.

(22) Rezident iz člana 3 stava 1 tačke e) ovoga zakona ima pravo na osnovni lični odbitak iz stava 1 ovoga člana.“.

Član 6

U članu 28 stavu 4 riječi: „člana 25 stavova 1, 2 i 3“ zamjenjuju se riječima: „člana 25 stavova 1, 4, 5 i 6“.

Član 7

U članu 29 stavovima 5, 7 i 8 riječ: „isplaćenim“ zamjenjuje se riječju: „obračunatim“.

Član 8

Član 33 mijenja se i glasi:

„Član 33

(Utvrdjivanje poreza na dohodak od imovine)

(1) Na dohodak od imovine koji se ostvari naplatom zakupnine za koji je propisana obaveza podnošenja godišnje porezne prijave porezni obveznik obračunava porez po isteku poreznog perioda.

(2) Porez iz stava 1 ovoga člana obračunava se na poreznu osnovicu utvrđenu u skladu s članom 8 ovoga zakona po stopi iz člana 10 ovoga zakona.

(3) Dohodak iz stava 1 ovoga člana unosi se u godišnju poreznu prijavu.

(4) U propisanom roku za podnošenje porezne prijave porezni obveznik dužan je u potpunosti izmiriti obavezu poreza na dohodak od imovine iz stava 2 ovoga člana za prethodni porezni period u skladu sa Zakonom o Poreznoj upravi Brčko distrikta Bosne i Hercegovine.

(5) Na dohodak od imovine koji se ostvari izdavanjem kuća, stanova, soba i kreveta putnicima i turistima obračunava se i plaća porez pri svakoj naplati u skladu s članom 21 stavom 9 tačkom b) ovoga zakona.

(6) Porez iz stava 5 ovoga člana obračunava se po stopi od 10 % (deset posto) na poreznu osnovicu koju čini naplaćeni iznos zakupnine od izdavanja kuća, stanova, soba i kreveta putnicima i turistima umanjen za rashode iz člana 21 stava 9 tačke b) ovoga zakona bez prava na lični odbitak.

(7) Obračunat i uplaćen porez od izdavanja kuća, stanova, soba i kreveta putnicima i turistima smatra se konačnom plaćenom poreznom obavezom i ovaj dohodak na koji je plaćen porez ne unosi se u godišnju poreznu prijavu.

(8) Porez na dohodak od otuđenja nekretnina plaćaju porezni obveznici na svaki pojedinačni dohodak ostvaren otuđenjem nekretnine istog dana ili prvog narednog dana po izvršenoj prodaji nekretnine, a koji se utvrđuje od porezne osnovice u skladu s članom 21 ovoga zakona primjenom stope od 10 % (deset posto).“

Član 9

U članu 38 stavu 5 riječi: „članom 33 stavom 6“ zamjenjuju se riječima: „članom 33 stavom 7“.

Član 10

Iza člana 38 dodaje se novi član 38a koji glasi:

„Član 38a

(Podnošenje prijave)

(1) Prijava s podacima za utvrđivanje poreza na dohodak podnosi se mjesečno i godišnje u papirnatom ili elektroničkom obliku.

(2) Podnošenje prijave u elektroničkom obliku propisuje se pravilnikom koji donosi direktor, uz prethodnu saglasnost Vlade Brčko distrikta Bosne i Hercegovine.

Član 11

U članu 41 stavu 1 riječ: „isplaćenim“ zamjenjuje se riječju: „obračunatim“.

Član 12

U članu 45 iza stava 1 dodaje se novi stav 2 koji glasi:

„(2) Pravilnik iz člana 38a stava 2 ovoga zakona donosi direktor u roku od šezdeset (60) dana od dana stupanja na snagu ovoga zakona.“

Dosadašnji stav 2 postaje stav 3.

Član 13

Ovaj zakon stupa na snagu osmog dana od dana objave u Službenom glasniku Brčko distrikta Bosne i Hercegovine.